

*In chest documen- letare o vin spiegât ai predis de diocesi di Udin, il parcè de nestre siele teologjiche e pastorâl di incjarnazion tal popul furlan: opzion di fedeltât a Gjesù Crist.*

## AI PREDIS DE NESTRE DIOCESI DI UDIN

Fate sul tai di Crist (gr. symmorfos tō Christō), la glesie no si à di ridusile dome a robe di chest mont, ma nancje dome di chel altri mont, come Crist che nol è dome om e nancje dome Diu ma misteriosamentri chel e chel. Cussì se si pratint che la glesie sicu robe di chest mont e sedi pardut compagne, si finis cul dineâ la sô umanitât ch'e je la nestre di umign diferents par storie, culture, mût di jessi e di vivi; d'altre part se si dinee il stes Signôr, la stesse fede e il stes batisim (S. Pauli), si dinee ce che di chel altri mont e à intorsi e ch'al è edentic par ducj.

Poben o sarin di une bande ducj de stesse glesie, ma di chê altre ognidun de sô. Al è par chel che a son nassudis tantis glesiis come ch'a son tancj i popui che te storie a àn vude une filusumie (al ven a stâi un cuarp) che ju disferenziave di chei altris: al è par chel che a son nassudis no dome lis diocesis (ridotis masse voltis a ufizis di ordins dal alt) ma ancje patriarcjâts, sicu il nestri di Aquilee, cuntun cuarp tant propri, une filusumie tant sô di pratindi di jessi une glesie umanamentri diferente ancje di chê di Rome. Nus e àn disfate, ma no àn rivât adore di disfâ chê nestre umanitât che s'e veve fate e fate ben.

Pal moment no pratindin di rissussitâ nuie e nissun, ma nancje di lassâ pierdi chê umanitât popolâr che une volte e à fat nassi une sô glesie e che cumò no si devi trascurâ se si vûl che la nestre religjon e sedi nestre, no resti foreste pal nestri popul e e finissi cul sgridelîsi ta chescj agns di savoltaments.

La glesie di Crist par jessi in chest mont, e scuén vê un popul che se cjape sù, come il fi di Diu che par vegnî in chest mont al è diventât ancje fi di Marie, un ebreo de tribù di Gjude: cussì la glesie chenti in Friûl no pues, e scuén jessi furlane.

Di cheste glesie tal moment di cumò, o vin pensât ch'al va ben dî alc, ancje se no dut ce ch'al sarès di dî.

La nestre diocesi, come dute la glesie, e sta passant un moment difencil inte teologjie, o miôr un periodo dulà che si cirin sistemis o ponts di riferiment gnûfs par incjarnâ in dî di vuê la dutrine.

Chest fenomeno che si pò clamâ pluralisim, a pensâle ben, al scuén jessi parcè che o scugnìn fâ ancje nô chel lavôr che a àn fat i vecjos pai lôr timps: presentâ al mont di cumò e cu lis nestris peraulis il credo di simpri.

Il problema vêr de diocesi al è però un altri:

no je plui clare la distinzion, disin cussì, fra dutrine e scuele teologjiche, in mût che no si rive a capî dulà ch'e je la forme e dulà ch'e je la sostanza. Achì i predis tirâts sù une volte cun cuatri principis di fonde che no molin, a àn reson di dî che no si cjatin; e la situazion no je bieles par ducj parcè che al sta cjapant fuarce un relativisim teologjic e di consequence etic e pastorâl che par nô e pe int si trasforme in cunfusion.

Cunfusion in diocesi e je ancje fra antropologjie e teologjie o, par capîsi miôr, fra naturâl e sorenaturâl.

Culî bisugne tirâ in campo l'ufizi catechistic parcè che nus samee che in chescj agns al à sfuarçât masse l'idee che un nol fâs ben catechesi se no si intint di dutis lis sciencis di cumò e se nol à i ultins metodos di mode.

Chest al è un quartâ i predis a cirî plui manieris e robis umanis che no la sostanza de fede. E intant al cole l'essenziâl che i vecjos a vevin tignût dûr: credo, comandaments,

virtûts cardinâls e teologâls, sacraments, preiere e lâ daûr a Gjesù Crist.

Invezit, se un metodo pedagogjic al è di cirî, al è seont nô chel di scuviergi ce che il Pari eterno al à semenât te nestre int. Parcè che il popul furlan come ducj i popui dal mont al à par pedagogo il Pari ch'al svilupe in maniere origjinâl ce che di origjinâl al à fat.

Il studi de nestre storie e de situazion di vuê nol è ni pulitiche ni separazion ma un dovê di religjon.

Cussì nô o sin convints che par fâ front a chel relativisim di sostanze e di metodo ch'al sta smamint ancje la glesie di Udin, il cjaveç al sarès di tornâ a viodi i rapuarts tra fede e culture di culî.

O sin convints di no mancjâ di rispjet a un grant e antîc concili (Calcedonie an 451) se o cjolin come esempi dai rapuarts fra peraule di Diu e sô incjarnazion intune storie, ce ch'al è stât dit pe nature umane e divine inte persone di Crist; ven a stâi, fede e culture intun popul:

no si àn di confondi - ni di miscliçâ - une no pò stâ cence chê altre - ni si puedin distacâ.

Chest seont nô al è il cjaveç par une vere teologjie, catechesi e pastorâl e la fonde di une sane religjon.

In pratiche o proponin che in diocesi:

- Si insemi e si predicji la grande tradizion de glesie che al à ricognossût ancje il Vatican secont, cence meti dentri e fâ passâ par fede il mût di viodi di chest o chel autôr di teologjie.
- Il guviêr de diocesi al sedi plui serio:  
tal fâ capî quale ch'e je la strade di fonde e dulà che invezit a son tentatîfs di predis e esperiencis personâls;  
tal rispjetâ i predis massime intes nominis che a vegnin fatis cence sens pastorâl pratindint l'ubidience dai biâts e cence tignî cont des regulis precis di vuê e di tradizions antighis come il juspatronât, inamovibilitât, dirits di plêfs;  
tal cirî un mût di governâ ch'ai sedi plui adat a la mentalitât dal clero furlan ch'al è pratic, popolar e sclet.
- L'ufizi catechistic ch'al ciri di capî i metodos e la catechesi ch'al propon e ch'al viodi di agjornâsi seont lis usancis, la vite e l'istruzion dai nestris paîs.
- E vegni finalmentri dade dongje une clape di int di culture e di cjâf par scomençâ studis e publicazions di valôr sui doimil agns di storie de nestre glesie locâl.
- Intes parochis, prime di butâ in bande ce che di bon i vecjos a àn lassât, si pensi sore.  
Al è un mâl che in chescj agns i predis di une certe etât a vedin scugnût cuintri voe e dome par ubidience scartâ usancis sauridis di une volte par modis lamiis di cumò. Al è lât pierdintsi cussì un patrimoni e un tesaur ch'al nudrive lis lidrîs seculorums indaûr (cence altri intal rît patriarcjin), ch'al veve cjapât fuarce tai secui e ch'al pandeve il mût origjinâl dal incjarnâsi de fede intun popul. Se la leç supreme de pastoral e je la salvece des animis, ce

ch'al jude a chest al è di tignî sù.

- Intes parochis che si tegni cont di ducj, parcè che il predi al è plevan di dut il paîs e no dome de comunitât.
- Inte dutrine e pastorâl, tai cjants e mût di fâ la liturgjie che si vadi a la sostance des robis spiegant chê fede che rive al cûr, al cjâf, al sintiment e ai problemis di culî, e rispietant e stimant chê culture furlane, todescje o slave che la int e à.

1.11.1978, Fieste dai Sants

I predis di Glesie Furlane